

03. oktober 2016

UKA2016/78

Inatsisartunut aalajangiiffigisassatut siunnersuutigineqarpoq Naalakkersuisut peqquneqas-sasut Inatsisartut peqqussutaata nr. 12, 19. November 2007-imeersup Namminersornerullutik Oqartussat kommunillu inissiaataanik attartortittakkanik inissiatut imaluunniit illutut nammineq pigisatut tigusisarneq pillugu, aalajangersakkat allanngortinnejassasut ilaqtariit ataatsit illui tuniniaanermi akigitinneqartut kisiisa atorlugit tiguneqarsinnaalersillugit.
(Inatsisartunut ilaasortaq Steen Lynge))

Inatsisartunut ilaasortap Steen Lynge Atassut, oqaluuserisassanngortitaanut Siumumiit imaattumik oqaaseqassuugut.

Siumumiit oqaatigissuarput siunnersuuteqartup ujartungaa, tassalu aki pivusoq, attartortuunermiik piginnittuulernermut atorlugu akiliisitsisoqartarnissaanik ujartuinera isumaqatigilluinnaratsigu.

Tassami sineriapput tamaat eqqarsaatigissagaanni ilaqtariit illui assigiinngitsorujussuarmik tunineqarnerminni akilersinneqartartut ilaanni “ingasaginartumik” assigiinngittarmata.
Ilaqtariit illui nunatta avannaaniittut 100.000,- ataallugu amerlasuutigut akilersillugit tunineqartarput. Nunattali ilaani taamatulli pisoqaatigisut angissuseqartullu ilaatigut quleriaat angullugu akimik-kut nikigasarlutik.

Akit taamatorujussuaq nikigasarnerat inissaaleqinermik peqquteqartarpoq aammali isikkiviup ake-qartinneqarneranik peqquteqartumik aamma akitsorsaasoqartarluni.

Siumumiit isumaqarpugut ukiorpassuarni pisortat attartortittagaanni attartortuusoq tassaasariaqartoq siullerpajulluni aperineqartussaq inigisaminnik piginnittunngorsinnaanermut. Taakkuppummi akilersuiuartuusimasut angerlarsimaffimminnillu paarsiuarsimasut.

Siunnersuuteqartup ilaqtariit illuinik pisortanik pigineqartunik tuniniaanermanni “kammalaatfersortoqartarsinnaaneranik” pasilliuteqarnera isumaqatigivallaanngilarpoq. Taamaakkaluartoq Siumumiit attartortuunermiik piginnituunermut periarfissat annertusarneqarnissaat kissaatigivarput.

Siunnersuummi ukiorpassuarni attartortooreersut sallitikkunnaarsinnaaneranik paasinninnerput aallaavigalugu siunnersuut taamatut isikkulik Siumumiit itigartikkatsigu matumuuna nalunaartigaarput.

Qujanaq.

Jess Svane

Siumut